

आकाशवाणी जयपुर-अजमेर
प्रादेशिक समाचार

- प्रधानमंत्री नरेन्द्र मोदी आकाशवाणी ऊं मन की बात कार्यक्रम मांय आप रा विचार कर्या साझा- लोगों ऊं हर घर तिरंगा अभियान अर एक पेड़ मां के नाम कार्यक्रम ऊं जुड़ण री अरजी करी।
- मन की बात कार्यक्रम ने ले र प्रदेश मांय ई निजर आयो उमाव-कुल्हाडी बंद अभियान रो जिक्र कर्या जावण ऊं गांव वाळां जताई खुशी।
- केन्द्रीय मंत्री मनोहर लाल खट्टर कह्यो -केन्द्रीय बजट 2047 तांई विकसित भारत रा संकल्प ने साकार करण वाळो साबित व्हेला।
- भारतीय महिला निशानेबाज मनु भाकर महिलावां री पेरिस ओलंपिक मांय 10 मीटर एयर पिस्टल होड़ मांय कांसी रो तमगो जीत ने रच्यो इतिहास।

000

प्रधानमंत्री नरेन्द्र मोदी देशवासियां ने हर घर तिरंगा अभियान अर एक पेड़ मां के नाम कार्यक्रम ऊं जुड़ण अर सैल्फी ले र सोशल मीडिया माथे अपलोड करण री अरज करी है। आकाशवाणी ऊं आज मन की बात कार्यक्रम मांय प्रधानमंत्री देश वासियां ऊं 15 अगस्त ऊं पैला आप रा सुझाव वां तांई भेजण री अरज करता कह्यो के वे स्वतंत्रता दिवस रा भाषण मांय आं सुझावां ने भेळा करण री कोशिश करेला।

.....

प्रधानमंत्री देश री संस्कृति माथे गर्व करण अर ई बारा मांय व्हे रह्या जतन रो जिक्रो कर्यो। वणा न्यारा-न्यारा शहरां मांय सड़क किनारे दीवारां माथे बणायी ज्यी पेन्टिंग री सरावना करता कला अर संस्कृति प्रेमियां ऊं पब्लिक आर्ट माथे काम करण री अरज करी। श्री मोदी हेंडलूम उत्पादां अर ई काम मांय लाग्या न्यारा-न्यारा संगठना अर स्टार्टअप रो जिक्रो करता 7 अगस्त ने मनाया जावण वाळां राष्ट्रीय हेंडलूम दिवस ने ले र हेंडलूम कारीगरां रा कामां री सराहवना करी। वणा हेंडलूम कामगारां ऊं वां रा उत्पादा ने हैशटेग “माय प्रोडेक्ट माई प्राइड” माथे अपलोड करण ने कह्यो।

प्रधानमंत्री नरेन्द्र मोदी असम रा चराइदेव मोइदाम ने यूनेस्को री विश्व धरोहर ठौड़ां मांय भेळा कर्या जावण ने मान री बात बताया है। प्रधानमंत्री सुणण वाळां ऊं ओलम्पिक खिलाड़ियां रो हौसलो बधावण री अरज करी। श्री मोदी कह्यो के दुनिया भर मांय अंतर्राष्ट्रीय बाघ दिवस काले मनायो जायेला। प्रधानमंत्री कह्यो के बाघ भारतीय संस्कृति रो अभिन्न अंग रीया है अर जंगळात रे आरे-सारे रा गांवां मांय लोग बाघ रे साथै सद्भाव ऊं रहणो जाणे है। श्री मोदी उत्तर प्रदेश रा पीलीभीत मांय चाल रह्या 'बाघ मित्र कार्यक्रम' ई जिको कर्यो।

प्रधानमंत्री रा मन की बात कार्यक्रम ने सुणण सारू प्रदेशभर मांय घणो उमाव देखी ज्यो। प्रदेश भाजपा दफतर मांय भाजपा ओहदादार अर कार्यकर्तावां भेळां कार्यक्रम ने सुण्या। जिला मांय ई पार्टी कार्यकर्तावां ने भेळा कार्यक्रम सुणावण सारू बन्दोवस्त करी ज्या। बीकानेर मांय केन्द्रीय मंत्री अर्जुन राम मेघवाल अर महिला बाल विकास मंत्री अन्नपूर्णा देवी कार्यकर्तावां साथै मन की बात कार्यक्रम सुण्यो। अजमेर अर बूंदी समेत न्यारा न्यारा जिला मांय लोगां अर भाजपा कार्यकर्तावां मन की बात कार्यक्रम ने सुण्या। मुख्यमंत्री भजनलाल शर्मा आज दिल्ली रा भाजपा राष्ट्रीय दफतर मांय प्रधानमंत्री री बतळ ने सुण्या। श्री शर्मा कह्यो के प्रधानमंत्री नरेन्द्र मोदी 'मन की बात' कार्यक्रम मांय राजस्थान रा रणथंभौर रा 'कुल्हाडी बंद पंचायत अभियान' रो खास जिको कर्यो है। ई अनूठी पहल रे तैत वठां रा समुदाया जगळांत हलकां मांय कुल्हाडी नी ले र जावण अर पेड़ां री कटाई रोकण रो प्रण लियो है। प्रधानमंत्री कानी ऊं ई अभियान री सराहवना प्रकृति प्रेमियां ने बधावो देवण वाळी है। ई मौके भाजपा रा राष्ट्रीय अध्यक्ष अर केन्द्रीय मंत्री जे.पी. नड्डा, केन्द्रीय रक्षामंत्री राजनाथ सिंह, केन्द्रीय गृहमंत्री अमित शाह अर न्यारा-न्यारा राज्यां रा मुख्यमंत्री अर उपमुख्यमंत्री मौजूद रह्या। मन की बात कार्यक्रम मांय प्रधानमंत्री नरेन्द्र मोदी रे बाघ संरक्षण ने ले र स्थानीय लोगां री भागीदारी अर कुल्हाडी बंद पंचायत रो जिको कर्या जावण ऊं रणथंभौर परियोजना रे आरे-सारे रा गांवा वाळा खुशी जतायी। बाघ परियोजना रा रिटायर्ड मुख्य वन संरक्षक वाई.के. साहू कह्यो के कुल्हाडी बंद पंचायत ऊं बाघ संरक्षण ने बढावो मिल्यो है।

प्रधानमंत्री नरेन्द्र मोदी रा मन की बात कार्यक्रम मांय बाघ संरक्षण सारू गांवा वाळां कानी ऊं करी जा री कोशिश रो जिको कर्या जावण ऊं परियोजनां हलका रे सारे रा लोगां मांय उमाव है और ब्यौरो म्हाणा खबरनवीस ऊं-

केंद्रीय ऊर्जा मंत्री मनोहर लाल खट्टर कह्यो है के राजस्थान मांय बुनियादी ढांचां उद्योग ऊर्जा अर पर्यटन माथे ध्यान दियो जा रह्या है। श्री खट्टर आज जयपुर मांय केन्द्रीय बजट ने ले र खबरनवीसा साथे बतळ करता बजट मांय करी ज्या प्रावधानां री जाणकारी दी। वणा कह्यो के केन्द्रीय बजट 2047 ताई विकसित भारत रा संकल्प ने साकार करण वाळो व्हेला। वणा कह्यो के आम बजट मांय 12 नुवां औद्योगिक पार्का ने मंजूरी दीरीजी है। जिण मांय जोधपुर, पाली, मारवाड़ औद्योगिक पार्क ई भेळा है। इण रे बणण रे पछे कोई 40 हजार लोगां ने रूजगार मिलेला। प्रेस वार्ता रे दौरान उद्योग मंत्री राज्यवर्द्धन सिंह राठौड़, ऊर्जा राज्यमंत्री हीरालाल नागर अर जयपुर सांसद मंजू शर्मा ई मौजूद री। इण रे पछे प्रदेश भाजपा दपतर मांय प्रबुद्धजनां ऊं केन्द्रीय बजट माथे चर्चा करी। केन्द्र री एनडीए सरकार कानी ऊं पेश करी ज्या बजट मांय विकसित भारत री परिकल्पना ने साकार करण सारू केई प्रावधान करी ज्या है। बजट रा खास प्रावधानां री जाणकारी देवता केन्द्रीय महिला अर बाल विकास मंत्री अन्नपूर्णा देवी अर केन्द्रीय कानून मंत्री अर्जुन राम मेघवाल कह्यो के बजट देश रा विकास मांय मील रो पत्थर साबित व्हेला। दोन्यू केन्द्रीय मंत्री बीकानेर मांय खबरनवीसा सामी बोल रिया हा। केन्द्रीय महिला अर बाल विकास मंत्री अन्नपूर्णा देवी बीकानेर मांय बजट परिचर्चा कार्यक्रम मांय ई शिरकत करी। वणा परिचर्चा मांय कह्यो के राजस्थान मांय डबल इंजन री सरकार प्रदेश रो तेजी ऊं विकास करेला।

000

पेरिस ओलिंपिक रे दूजे दिन भारतीय महिला निशानेबाज मनु भाकर महिलावां री 10 मीटर एयर पिस्टल होड़ मांय कांसी रो तमगो जीत ने इतिहास बणायो है। मनु भाकर शूटिंग मांय भारत रे तमगो दिरावण वाळी पहली महिला खिलाड़ी बण ग्यी है। निशानेबाजी मांय भारत ने 12 साल पछे ओलंपिक खेला मांय तमगो मिल्यो है। राष्ट्रपति द्रौपदी मुर्मू अर प्रधानमंत्री नरेन्द्र मोदी पेरिस ओलिम्पिक्स मांय 10 मीटर एयर पिस्टल होड़ मांय कांसी रो तमगो जीत ने भारत रो पदक तालिका मांय नाम दर्ज करावण माथे मनु भाकर ने बधाई दी है। वटे ई राज्यपाल कलराज मिश्र, मुख्यमंत्री भजन लाल शर्मा अर पैली रा मुख्यमंत्री अशोक गहलोत वां ने बधायी दी है।

000